

أسواق الرقيق

مجموعة قصصية

أحمد محمود كانم



بطاقة فهرسة

حقوق الطبع محفوظة

مكتبة جزيرة الورد

اسم الكتاب : أسواق الرقيق

المؤلف : أحمد محمود كانم

رقم الإيداع :

الترقيم الدولي :

الطبعة الأولى 2019



مكتبة جزيرة الورد

القاهرة : ٤ ميدان حليم خلف بنك فيصل
ش ٢٦ يوليو من ميدان الأوبرا ت : ٠١٠٠٠٠٤٠٤٦ - ٢٧٨٧٧٥٧٤

إهداء

إلي

مطحوني رحي الحروب العنصرية علي امتداد
تراب البقعة الجغرافية المستمدة إسمها من سواد
بشرة بنيتها السودان .

إلي

أرواح صعدت إلي السماء كان حلمها وضع حد
لجبروت الدكتاتور المتسلط علي رقاب شعبه لعقود.

إلي

الحاجة / حليلة إبراهيم
والشيخ / محمود عثمان اللذين بذرا في داوخلي
معني الإنسانية والإنسان ..

أهدي هذه الشخايط المتواضعة

أحمد محمود عثمان (كانم)

المقدمة



انه عمل أدبي رفيع يفتح أسئلة ويحرر مناطق يصعب الحديث عنها. وان مجموعة الأستاذ كانم الشعرية وباكورة منشوراته يعد رمزا لحراك الشباب الواعي الذي يبشر كتاباته بمستقبل خالي من أزمت التاريخ المشوه. شباب لا يخشى أن يضيء النقاط المظلمة في الماضي ويقوم بمواجهتها بشجاعة حتى يتحرك نحو المستقبل محررا من إغلال ذلك الماضي بكل تفاصيله المؤلمة والمعقدة التكوين.

أن مثل كتاب الأستاذ كانم يقوم بنقلة حقيقة نحو كتابة الضحايا لتاريخهم بأنفسهم بدلا عن ان يكون تدوين ذلك التاريخ في أيدي الجناة الذين لن يكونوا امينين على الإطلاق في نقل الحقيقة أو في توضيح المظالم والجرائم التي حدثت كما هي.

ولذلك نحي هذا المجهود الجميل للأستاذ أحمد كانم والذي

نتمنى أن يكون بداية لمسيرة مستمرة من إنارة الوعي وفتح توابيت المسكوت عنه في تاريخنا وحاضرنا السوداني المأزوم. ونتمنى أن يحذو حذوه الكثير من الشباب الموهوب من الهامش ومن كل أطراف السودان التي لم يكتب تاريخها وحضرها بأيدي أصحاب الوجعة.

عثمان نوايب

كاتب صحافي

فجائع الانتينوف



سمعتُ أزيزاً في الفضاء
طفقت تنادي علي الصغار
هاهي الطيار...ياها الطياره
تعالوا شوفوها الطيار
طفوله خالصه مبرّئه
ما فاكراه ترمي عليها نار
ما شاهدت يوم في الفيلم
قصف الطياره ولا الشجار
إلا يومذاك شاهدت
وذاقت لفح النار جهار

شافت أبوها وأمها
أشلاء صرعي بالديار
مسكينه قايلاهم نيام
أخذت تصحيهم مرار
ساعات تمر والناس نيام
عادت وصرخت بإحتيار
مالو الخلق نومهم طويل
وشنو الحصل بعد الطيار

يا أمي أصحي بسرعه قوم
هيا نمشي الواتا حار
لبسك ملطخه بالدماء
فستان وتوبك والخمار
وأبويا ليه شكلك كده
والدم حواليك كالبحار !!؟

غابت شمسها وأظلمت

الموت اخذ كل الكبار

والجوع بيداعب في الحشا

والخوفُ معاه الإنكسار

جادت بي تلّه علي التُّكل

البُرمه (والزير في انهيار)

نزفت دماءها علي الفؤاد

ودموعها ظلت في انهمار

شوفوا الفرق ما بين مرام

الديمه بهجه وانبهار

كتلوها ناس من غير عقول

خالنها لحقت قطار

لو كانوا بكامل وعيهم

ما كان أذاقوها المرار

لكن مرام دارفور تموت
مغتصبه مرميه بعيار
من غير ذنب عاشت نزوح
عانت مشرده في الديار
مقتوله بي عقل كبير
عمداً ميتمه بالقرار
وروني جرمها كان شنو
لَمَنْ تُطارِد بالطيار
مرامنا راكبه علي الحمار
ومرامهم في (الجي إكس آر)
وينا العدالة ورحمتها
الناس قلوبها بقت حجار

مذبحة بانتيو



في يوم عبوسٍ قمطريزٍ
في ليلةٍ ما شافت قمرُ
(ربكونا) اضحت خلفهم
والكبري مليان بالكجر
كل المداخل أُغلقت
وتمساح جعان وسط البحر
وكنيسه إكتظت خلق
والباقي في الجامع صبر

وأخوي (جمال) كان ضمنهم
و (التوم) وآلاف البشر

والمشفي ذاتها إتملت
والخوف رفيق طول السهر
تجار مساكين همهم
عيش الوليدات فالسفر
رفعوا الأكف إلي السماء
يا الله جنبنا الخطر
أتباع (مشار) جاثو الديار
قاصدين دمارها بالثأر

دخلوا صباحاً كالجراد
عمّوا المزارع والخضر
نهبوا الهواتف والنقود
رشقوا الذخائر كالمطر
بعد النهب قتلوا الجميع
والدم علي الوديان شخر

قتلوا (بشير) قتلوا (جمال)

قتلوا المعالم والفكر

من غير ذنب أضحى الشباب

جثثاً مبعثره في النهر

وبكى وبكى كل الخلق

والزهر نوارها انستر

حتى الطيور ناحت وراي

وبكى معاي كل الشجر

ملعونه أمك يا حرب

كم من فؤاد بيك إنكسر

خريف بلدنا



يوم شوفت بَرّاق العَجِيل
أبرق ونادي علي الخريف
طلعت « جِلْمُونِيَّتي » الكبير
« مُحَرَّات » و « جَرَّايَّتي » الوليف
وديتو للأسطي الخلق
سنن وطرقهم رهيف
وطلبتَ لينا من الجزر
« مُنْساس » و « مُرَّين » والرغيف
« مَندوره » والبصل الخضر
« جرجير » و « دِينقابا » الحليف

شَدَّيْتُ دُغْشَ أَشْقَرِ حَمِيرٍ
فَنَدَسْتُ وَحَالَفَ كَانَ يَقِيفُ
يَوْمَ شَافَ حَمِيرَ «شَايَاتِ» هُنَاكَ
قَطَعَ «التَفَرَّ» أَصْبَحَ عَنِيفُ
دَنَقَرَ وَشَمَشَمَ فِي التَّرَابِ
طَارَ «لِلْفَرِيقِ» بَدَلَ الْعَرِيفِ
يَا «دِحِشْتِي» هَاوِ ..
وَشَشَّ يَا حَمَارُ
مَا تَبْقَى لِي «دَاقِيرِ» لَفِيفُ
هَنَسْتُ وَصَلَنِي الزَّرْعُ
طَاوَلْتُ فِي «الْوَادِي» الْوَرِيفِ

عَرَمْتُ بِالْفَاسِ الشَّجَرُ
«مَرَضُو» وَ «شَحِيطُ»
الكَانَ كَثِيفُ

كل « اللّوط » و« الأندراب »
« وهشابه » و« الكتر » المخيف
حُفر البعاشيم والجُقور
الفِي « الكَلَنَكِي » صَبَح نَضِيف
سَلَكَبَتَ رَمَلَت الدُّخَن
« فولاي » و« لوبي » و« عيش ريف »

جيت تاني يوم ، صَبَّ المطر
ملأ « الرهود » والجو لطيف
وَقَعَ « جواليس » المُدَن
فرش « الحِيط » فوق الرصيف
إلا المباني فيها « كوز »
ما جاها ويلات الخريف
فالكوز عَرَفَ عرق الشعب
أضحى الوطن « زيراً » ضعيف

والدنيا إمتلأت « بَرَوُزُ »
و « الحَسَكَنِيَّت » فسخت شريف
ورجعت شديت « أَمْبَهين »
بس باقي « جَنُكابات » خفيف
فلتحيا كل الأزيمة
وليسقط الكورُ السخيف

الخداع



أتاري كنتُ مخدوعه فيك

يوم صونت ليك حُبِّي المنيعُ

خليتني ما قادر أقول

هل حلم أم طيف مربع

لأنني عاثش في أمان

ما شوفت يوم زولا خديع

أتبادل البسمات معاك

ما فاكروه يوم تصبح شنيع

حظي الكئيب وداني ليك

والقسمه تمت في السريع

ورضيت بالمقسوم علي
وجعلت أيامك ربيع
خدعوك بي قول قال وقال
وبدأت في الشري والمبيع

بالله عليك لو ما القدر
يصبح قليبي معاك وديع؟؟
كاويه بي جمر العناد
ونسيتَ إنو هواك يضيع
وكتلت كل الكان جميل
وسقيتني من سم نقيع
وأصبحت عبثا لا يطاق
وأهنت شرفي الكان رفيع

حميتني حب كل الخلق

وعشانك جافاني الجميع
لكن خلاص معك السلام
ليسامحك الله السميع
لا رجعه لا أحزن عليك
ذكراك ينزفني النجيع
بس ألقى ليك زولا عطوف
يهديك زهرات الربيع

بوليس النظام



يا البوليس الكاتل شعبك
تاخذ كم قصاد الزول
يا ربي «العيش» بدوك مجاني
وبالمجان حبوب بندول ؟!
ولّا بتدفع ذّينا برضك
وأكلك مِتلنا «كسري» وفول ؟!
أمك وأبوك ذي باقي الناس
وللا وراك عالم مجهول ؟!

ياخي كَتَلْتنا في الساحات
حصدت رؤسنا حصاد قندول

عشان الكوز السارق قوتك

بقيت ممقوت

ملعون

معزول !!

لا تقول لَنَا جانيك تعليمات

فالكوز لا ربك ولا هو رسول

وانت بشر ، ماكُ ليهم آله

وكامل وعيك ماكُ مسطول

ياريت تتعوض بيهم أهلك

أو يوم تترقي وتصبح صول

نحننا مرقنا عشان أخواتك

زحل ، ووليد ، وسهام ، وبتول

ضد ناساً شربوا لبن أطفالنا

وصفُّوا «دقيقنا» وسرقو «كلول»

ما شايلين «بُمان» في إيدنا
ولا رافعين «دوشكات» أو كول
و ما بخوفنا تجونا متين
وبياتوا سلاح نسقطُ مقتول
ولو زِزانتك ضاقتُ بينا
أبني السودان سجنًا مقفول
بصدور عريانه نواجه نارك
وح نُسقطُ بكره نظام الغول
محكمة الشعب إشتاقت ليك
ومحال نترجع مهما يطول

عيد الحزن



كل عام والأحزان تزيد
فبأيّ جديدٍ عدتّ أيها العيد
أبذكرني الغائبين تمضي وتأتي
لتفتح جرحاً غائراً وتعيد؟؟
فأثمّ تداري لإبن دموعاً
حوته الترابُ قتيلاً فقيد
وأخٌ يئنُّ بسجنِ النظام
بظلمٍ سجيناً لوقتٍ بعيد
بجسمٍ هزيلٍ تلقى السياط
وعزمُ الحرّ تلينُ الحديد
مئات الألوف بأيدي (البشير)

فُرادي وجمعاً بظلم أُبِيدُ
وشعبٌ بريءٌ يعاني النزوح
بقَصْفِ (السَّخُويِّ) و (الجنجويد)
كانوا ملوكاً فهانوا وذُلُّوا
أبهذا عدتْ أيها العيد ؟؟؟!

كل عام وانتم بخير
فلا الخيرُ أتي ولا ذهب البشير
دارفور تنزف والجبال بمثلها
واكتسي النيلُ ألوان الحرير
كل عام والأسعار تنمو
وتغدو السلعُ جمرات السعير
ويسعي الجوع بين الناس حراً
كَسَعِيَ السقم في جسم الفقير
وتُبَاع الجامعات بسعرٍ بخسٍ

لَتُبْنِي بَأَنْقَاضِهَا بَيْتُ الْوَزِيرِ
وَيَسُودُ أَنْحَاءَ الْبِلَادِ فُسَاداً
فَالدُّنْيَى عَزِيزٌ وَالْعَزِيزُ حَقِيرُ
كُلِ الْأَعْوَامِ وَالسُّودَانِ خَالٍ
مِنْ كُلِّ حَقُودٍ قَاتِلٍ شَرِيرُ
وَعِشْتَ يَا وَطَنِي حُرّاً بَعْزُ
وَكُلِّ عَامٍ وَأَنْتَ بِخَيْرِ

تراب أفريقيا



أفريقيا فردوس الأرض
أهانوك يوم أسموك قارّة
الجنة لونها من شذاك
لو لأك ما داقت نضارّة
لو لا خضارك ما اتجمعت
جيوش السحاب ليلها ونهارّة
ولا فكرت يوم تنسحب
فوق الجبال لتعيد درارّة
ولا أطلقت صوت الرعود
والبرق أعلن ليك غارّة
ولا شوفنا دمعاً للسحاب

منهمره طفرانه بغزاره
ولا حتي يوم زارت فراش
زهراً تداعبها في نواره

أرضعتي أطفالك شموخ
أضحيتي للإنسان حضاره
وعشان جمال الفي ترابك
أبقي أهواك بي حراره

درشنو



لو كان الموت بإيدي ياخوي
بدري عليك كتبت خلود
كُتْ عشت يا (درشو) الحنون
وبقيتَ حي من غير حدود
لكنّ مطراق القدر
حطّم عليك كل السدود
قال ليه رب العالمين
سوق الجميع درب الجدود
دربُ عليه الكل محال
يختاه أو يشرد يهود

مشيت لتحرير موطنك
وحمايتو من لصي حقود
ظنينا إنك من هناك
ترجع علينا وحيّ تعود
ناداك مناد للإله
قال ليكَ أيّامك نفود
ما أصلو إنك ود أصيل
لو حتي بي روحك تجود

لبيت نداء رب الخلق
ورحلت بي عزه وصمود
غاردت متّ كما الرجال
ذي في العرين ميته الأسود
صدقنا بي جية الخبر
ورضينا بي حكمة ودود

وعرفنا إنو الكون زوال

وجميعنا من بعدكوفود

لا يحي غير المولي حد

قبلك رجاللقرون رقود

نم هانئاً يا ابن الرجال

في رحمة الله الودود

نم في أمانٍ وسلام

في الجنة في دار الخلود

مواسير كير



صدقني يا وطن الجدود
ثمنك أعزّ من الذهب
لكن طغاة حكمك بغو
وزادو في البغي النهب
نهباً جهاراً للحقوق
واموال شعب ضاعت لعب
ضاعت بظلم في العبث
والقاضي منّ النوم تعب

ليه يا (كير) تنسي الكلام
إذ قلت : لو فاز الحزب

تاخذو القروش مُضاعفاً
ويدوم مواسيركم رحب
صبّوا المياه علي الشجر
ودماءهم ساحاتك شرب
بعد النجاح الكلو زيف
صرحت أججت الغضب

إحتجّ صاحب الحق بكي و
دموا سالت مُنسكب
واحدین تظاهروا بالسلم
والوالي قابلهم ضرب
قال للحرس رُشّوا الجميع
ما تخلّوا مخلوق يقترب
أرموها سيّال الدموع
والطلقه في الراس والقلب

صمد المظالم في العراء

و(الوالي) فكَرَّ ينسحب

حراس شنو؟

وحراس منو؟

قوات شعب واللاً الحزب !!؟

سوق المواسير انكشف

وكشف معاهُ الكان حُجِب

ياريت شجرتك ما ارتوت

ملعون شجرتك... يا كلب

الفراق



سائلين عليك شمس السماء

في كل إشراقها ومغابها

يمكن تكون طلّت عليك

بين الزهور حلوه ومهابه

مبتسمه ذي عباد شمس

شالت أخبارك وجابها

منايا يا ست الحسان

رب القدر لفراقنا يأبأ

حتي في لحظات منام

عبر الحلم نصبح قرابا

أنسي الجحيم الكان جوأي
والدموع توقف صبابا
يا رب أرحم عاشقا
السهاد كاتلو و كآبه
وارحم حبيبا ليه مات
مقتول أسير بسجن غياها

محرقة لبدو



أيا لبدو هلاًّ علوتِ فخرا
بصمود ليوثك عند المدخلِ
غزتكَ الغزاة من كل فجٍّ
نزلوا هناك بوادي المنهلِ
وحملنا نحوهم عتاداً
كي لا ينالوا منك حبةً خردلٍ
فأطلقوا النيران نحونا رشقاً
وكان جوابنا صرخة قُبُلٍ
فكان الملتقى أعظم شاهد
لنزال بني العرين وأشعل

وجالت طيرانهم فوق رؤسنا
فأضحت النيران فوقاً وأسفل
وتسابقت «الميجات» صوب ديارنا
كتسابق الظمآن صوب المنهل
فاطلقت الطيران أحدث قصف
وتصاعد الدخان كعود الصندل
فقضوا علي الأملاك بكل حقد
فغدت صحراء رماد ومذبل

قتل، ونهب، واغتصاب، وحرق
تدمي الفؤاد وتدمع المقل
قبيل الظهيرة تمت جلاؤنا
كأنما سيارةً في البید رُحِّل
طفرتْ علي الخدود دموعنا
مودعةً دارَ الحضبان ومنزل

آه من ذاك اليوم وويله
وبرد شتائه وقبح المَقِيل

مكثنا حول «شعيرة» شهراً
وأياماً مكث عسرٍ ومهزل
وعدنا والعواصف تحثوا
علينا الرماد حثو الترمل
فلا عاش من عاداك يوماً لنا
نعم التراب ومهد صباننا الأول

جن الهوي



جنيتُ بحبك وصرت حائر
بيهو بقيت للأطفال حكاية
محل ما امشي يضحكو في
وبصفقه جارين بي ورايا
بيقولوا علي مجنون هواك
واصلو الجن ، علاجوا آيه
إلا جنون حبك يا غالي
لا بتعرف آيه لا محايه
بس عطفك وقربك مني علاج
فإنت بدايتي وانت نهايا

منتشاق



بتمني يوم أصبح واطير
وادوبي فوق وسط القماري
أحيا واعيش بين الطيور
أغدو وأروح من غير حصارِ
يا قمري لحظه اتسني لي
أنزل عشان أحكيك خياري
أو حتي لو في الجو تقيف
بس المهم تسمع خباري

فتشت ليك طول الزمن
داير أوصيك لي ديارى

أوصل رسالةً لي أبوي
تلقاهُ في ضلِّ العصري
ويمه واخواني الصغار
رافق معاك طيرَ الخُدَّاري
تمشي وتحوم فوق البيوت
غنيٌّ ولحْنُ أشعاري

واحلفُ بأشواقي الدفوق
ونهرِ دمعي الديمه جاري
قول ليهم مشتاق (للمدي)
(تأنقي) و(كشوك) مع (الجرّاري)
و(فرُنْقِيَّه) و(أم رِدم)
(جَكْتَك) بريدو و(ام تُنقاري)
و(امقَرْدُو) في عزِّ الدَّرْتِ
(نُقَّاره) داوِيَه ليلي ونهاري

حسابكم يا طير البلد
زوروني في حَتَّة وداري
محتاج إليك أنا يا بلوم
تُزِين أزهارِي وخضاري
وتُطْرِب بالهديل بيتنا
وتقلل سُهد أسهاري
وتشيل أشواقي لي زولاً
دوام أفشيهِ أسراري
مِنِّي السلام يا قمري قوم
ودِّهْهُ لي أهلي وجياري

ضياع قلب



إنت يا قلبي الجريح
لازم تُطبق تحمل صبرُ
عادةً القلوب دوماً هناك
بين الضلوع داخل الصدر
واخترت زولاً يا قَلْبِ
وليها سلّمت الأمر
قلب الحبيب الكان عنيد
أصبح هواك طول العمر

عاودتُ يا قلبي الجريح
لازم تطبق تحمل صبر

قال لي كفي للصبر حد
مليت خلاص درب الصبر
ضيعت قلبي مع الهوي
وفتشت لا صوت لا أثر
حاولت أزمقها بعيون
يمكن تكون فاهم النظر
قالت لي تعال قلبك معاي
حافظاه ليك أبد الدهر

طلبت إيديها بعجل
ولقيت محل قلبي الودر
فوجئت إنو الكان قبيل
محبوبه قطافة الزهر
مخطوبه لي زولا حظوظ
يادابو ويل القلب ظهر

قلتُ ليهُ أطلع يا قلب
ده سحاب سراب من غير مطر
أقسم وقال لي من هنا
إلا الملاذ داخل القبر

حسيت خلاص قلبي ضاع
وكسورو ما بتعرف جبر
بتمني من بيتهن يَهُب
ريحاً يجيب أحلي الخبر
ويتم منانا المِنْ زمان
طوّل سهادنا مع السهر
يا السمحه إنتي وإنتي بس
محال أحب غيرك بشر

مَهْجَتِي



محل ما بمشي وبغادر

بشوف صورتك علي خاطر

جمالك للقلب إحتال

عيونك ديمه لي أسر

لمحتك وانتي مبتسمه

قمر بين الشفاه ظاهر

قلبك كلو حنيه و

خودك وردتي النابر

دوام أطراك يا أحلي عيون

أقول أنساك وما قادر

وكيف أنساكِ وإنّ جواي
وبرضك في المنام حاضر
سلبت فؤادي من بدري
وصبح حبك علي قاهر
شبيهك ما في إلا خيال
ولاسمك ذاتو في النادر

عجائب الدنيا بقت تسعه
وحسنك أكمل العاشر
محال أغدر وأحب غيرك
وأعيش ليل الغرام ساهر
محاسنك إنّي مكتمله
رشاقه وخفه متكاثر
لحفظك سائل
المولي

من الحساد من الساحر
أهديتك أغلي ما عندي
هديتك مهجتي الطاهر
لأنك إنت في الأول
وبرضك تبقي لي آخر

أسواق الرقيق



بعد الشموخ والعنفوان
أمسي الوطن غربه وشقاءُ
سرقوه أبات الدقون
لبسوا الشرع (تَكّه) ورداء
قسموا الشعب لي إثنيات
لون الجلود صار إنتماء
قالوا العروبة هي الأساس
مشروع حضاري من السماء
والسود مَوَالِينا وعبيد
طول ما السواد لهم كِساء

باللون تُعزُّ بلا سبب
أو عادي تُضرب بالحذاء
باللون طفل (هِيَّانُ) طريح
(كَيْمان) مدرّجه في الدماء
باللون صبح سودانًا نار
أضحى الجنوب عن دازنا ناء
دارفورنا والنيل والجبال
باللون أذاقوها الفناء
بتروا البلاد بي حقدهم
منعوا الشعب حتى البكاء

قلبوها أسواق الرقيق
والكوز هناك قبض التمن
كل الحصل بإسم الإله
رغم البشاعة والعفن

بِاسْمِ الإِلَهِ جَيْشِ الشَّعْبِ
مَبِيعُ يُكَاتِلُ فِي الْيَمَنِ
مَاتَ الْأُلُوفُ بِاسْمِ الإِلَهِ
أَشْلَاءَ مَا لَا قَيْنَ كَفَنُ
بَاقِي الشَّعْبِ عَائِشُ النِّزْوَحِ
وَالْبَاقِي فَاتِ سَابِ الْوَطَنِ

عَبَرُوا الصَّحَارِي وَالتَّلَالِ
فِي (الْلُورِي) مَرْدُومِينَ رَفُوفِ
كَانَ قَصْدُهُمْ بَعْدَ الْبَحْرِ
بِلَدِ النِّقَاطِ عَلَى الْحُرُوفِ
بَسَ قَابِلُوهُمْ قَوْمَ ثُمُودِ
هَدَدُوهُمْ ، وَأَرْغَمُوهُمْ لِلْوُقُوفِ
إِتْقَاسْمُوهُمْ كَالْخِرَافِ
قِيدُوهُمْ

وخزنوهم
في الكهوف
و(الليبي) قام دقّ الجرس
والسود عرايا صفوف صفوف
بالمكرفون ذاع السعر
والزول أقلّ من الخروف

ما راعوا أنسنة البشر
ما عرفوا يوم حرمة ضيوف
وعذاب أليمّ للما رضح
(أدينين) مخرّمه و(الأنوف)
والدم يسيل حتي الرُكب
(تشتيش) و(تسليخ) بالسيوف
جنزير يُكشِكش في الرجول
(كُرباج) يصفق في الكتوف

كل ذنبهم لون السواد
جاهلين بأن الناس صنوف
دليل ما عبيدك يا خمج
فتح عيون عقلك وشوف
متلك بشر نفس الصفات
حرّاً طليق وإنسان ولوف

تنهيد الهامش



يوم أمو قالت : يا جنائي
قطّعتَ شريان القلب
أربع سنين بعد الفراق
ودموعي تتقطّرُ دِرْبُ
أرجع تعال خليك معاي
أو بيع « السخيلات » واغترب
خايفاك تخليني وتموت
أو في المعارك تنضرب
قال ليها عفوك يا النعيم
أنا ما البيخازل وبيحتجب

قولي اغتربت ،
وجيبت «جرّارات قروش»
أحميها كيف من السلب؟؟
أنالي رسالته في دُنيتي
بي دمّي لازم تتكتب
ما برضي غير «نائر» أكون
طول ما البلد حاكمو الذئب
و محال أسيب أهلي الغبش
النازحين من غير ذنب ؟
وكيف أطيق الجنجويد
يحرق
ويقتل
ويغتصب ؟!

« دَرشو » و « محمد » غادروا

وجميعنا من لبنك شرب
وأنا ذِيَّهم ، ما بنحني
ومحال أخاف عضة كلب
مهما حييت لا بد أموت
فوق السرير أو في الحرب
وأنا ليّ «عهد» مع الرجال
الساووا في نفس الدرب
«دكتور خليل» الفي الحروب
بركان و ناراً ملتهب

« باتريس » و «سِنكارا» و «قرنق»
«بولاد» و «مانديلا» السديد
و «وذ أبكر» حتي الممات
ما فكر يخذل أو يحيد
و «ود كورتي» مع «بدوي» و «سليم»

و «فضيل رَحومة» الكان فريد
«أبورنات» و «جمّالي» و «جمال»
«صاقور» ، و «كاكوم» و «الرشيد»
«سانسيس» و «مولانا» و «شقيش»
شربوا الرصاص مضغوا الحديد

يا أمي سامحيني وكفي
شيلي الصبر خليك شديد
قالت ليهو : أمضى معاك رضاي
أصلك وليد فارس عنيد
من غير وداع رحل الخلق
في «تروجي» مات مقتول شهيد
«كارلوس» معاه سافر رحل
يوم جانا نغيهم من بعيد
مات بعدهم «عبدالرحيم»

و«ادروب» و«شادي» و«الحميد

غادر وسافر «ود هري»

و«زبيدي» مات غدرأً وحيد

«جر كس» و«جبر الله» و«عشر»

و«ود البليل» أصبح فقيد

«كاريننو»

و«طراده»

و«أبو صدر»

و«مندي» الفتي الحرب صنديد

مات في الكفاح ناساً كُتار

و«صهيب» و«زروق» السعيد

أبكيك يا «ابراهيم» أخوي

وأحزاني تتعمق تزيد

خليتُ وراك عمق الجراح
بدل النجيع ينزف صديد
قسماً لعهدك ما بنخون
إما النجاح أو موتُ أكيد
شمس الظلم لازم تغيب
شان يسعد الجيل الجديد

نبذة عن الكاتب

* الاسم : أحمد محمود عثمان محمد (كانم)

* الجنسية : سوداني

* تاريخ ومكان الميلاد : 1986 _ شرق دارفور _ منطقة لبدو

* كاتب صحفي

* إستشاري إعلام

* سكرتير تحرير صحيفة «صوت الهامش» السودانية

* لديه أعمدة مقالات صحفية يومية بعدة صحف سودانية

* أسس مدرسة « خالد بن الوليد الاساسية» لبدو

* عمل مدرساً بمرحلتي الأساس والثانوي بنيالا ولبدو لبضع

سنوات

* المؤهلات :

* دبلوم في الدراسات الإسلامية والإعلام _ المعهد العالي

للدراستات الإسلامية-كسلا 2005م

*بكالوريوس علوم الاتصال والإعلام - جامعة وادي

النيل 2008

* دبلوم عالي في الصحافة والإعلام - الجامعة الكندية بالقاهرة

2017م

* حاصل علي لقب إستشاري إعلام من المركز الدبلوماسي

التابع للجامعة الكندية بالقاهرة

*دبلوم حاسوب MOP- 2011

* دبلوم صيانة الكمبيوتر PDC get 2014

*دورات تدريبية للمعلمين - 2008م

* كورسات لغة إنجليزية - الجامعة الامريكية بالقاهرة 2016م

*كورسات لغة إنجليزية - معهد سانت اندرو 2017م

* كورسات فن إدارة المشاريع - مركز CRS القاهرة 2016م

الفهرس

إهداء	3
المقدمة	5
فجائع الأتنيوف	7
مذبحة بانتيو	11
خريف بلدنا	14
الخِداء	18
بوليس النظام	21
عيد الحزن	24
تراب أفريقيا	27
دَرشو	28
مواسير كبر	32
الفراق	35
محرقه لبدو	37

40	جن الهوي
41	مشتاق
44	ضياع قلب
47	مُهجتي
50	أسواق الرقيق
55	شهيد الهامش
61	نبذة عن الكاتب
63	الفهرس

